


浙東紀游

地824
863

蘇州吳梅 字程安別號霜厓 188—1939 藏書



獻書人吳梅

浙東紀游
草

道光壬午
春
鷓

浙東紀遊草

愚溪老人沈錫爵著

渡錢塘江

江名羅刹舊錢塘此去聊憑一葦杭渡客莫愁波浪起
風狂卻笑我尤狂

舟半渡狂飈忽起幸中溜已過將近西興水不甚
深同伴多戒心而老人自若也

泊曹娥江謁孝女祠題壁

路過曹江暫泊舟千秋孝女姓名留滔滔一派江頭水
多是當年血淚流

浙東紀遊草

一

孝女事詳志乘由其純孝格天勅封純孝夫人殿
額係劉青田書廟貌巍峩香火絡繹其江卽號爲
曹娥云

由曹娥江換舟至嵎縣

江行不比蓼莪灣趁得長風任往還百里煙波舟一葉
兩邊無處不青山

蓼莪灣雖有溪流不通舟楫前在孝女祠焚香進
謁拜禱順風是日由江至嵎果遇順帆否則逆流
沙淺四五日不能到而一路山青水碧宛置身於
圖畫中也

由嵒縣坐竹輿陸行

連朝篷底看雲煙起喚籃輿坐一肩行到溪邊還問渡
竹排來往穩於船

大竹二十餘根排列成桴渡人載物多用此排

過斑竹

地名斑竹聲稱雅不道殊方陋習多盆菜價昂盂飯貴
那堪臨睡賣嬌歌

地亦四方投轄之所但習俗相沿菜蔬一餐青蚨
百計將及點燈卽有土妓三四輩檀板銀箏繞客
房而坐謂之賣嬌歌必索花粉錢而去老人預戒

浙東紀遊草

二

輿夫疾馳過此投宿大佛寺

大佛寺

金身幻像感英豪傳是錢王夢裏遭漫向西湖誇佛大
此間更有八尋高

西湖大佛寺其像僅營半肩不若此之全身聳峙
高且八尋相傳錢王夢感金身因造此像卽名其
寺

山行

野曠天低噪暮鴉迷離雲樹夕陽斜飄來幾陣濛濛雨
開遍山頭轆軸花

轆軸花色黃數朶攢開遠望若黃牡丹昔遊洞庭
握取數本植於庭今僅存其一花時爛漫可供案
頭清玩

台州道中

忘形相對泛虛舟酒渴偏教賦倦遊欲覓村醪無處問
相逢惟有一羣牛

天台道中行百里無人煙投宿僧寺其待客俱不
設酒同遊吳公素喜麴蘖輒有沽酒向誰家之嘆
路上往來皆販牛客千百成羣降阿飲池亦暢觀
也

浙東紀遊草

三

宿藍橋華頂寺有感

興公一賦景空描華頂躋攀興易消名勝蘇杭遊不盡
崎嶇偏要到藍橋

劉阮入天台流傳艷異志書所云山高萬有八千
丈藍橋瀑布爲天下奇觀孫綽賦天台至比之蓬
萊三島老人強撐健骨以博一遊豈知山俱平塌
絕無巉巖峭壁所謂瀑布係澗中瀉出不在山頂
而在山足亦無甚可觀藍橋乃澗中橫亘之片石
長約二三丈濶二尺餘其平與岸相埒並不峻險
因水在橋下衝激下視深澗故不能舉步耳然亦

可繞道至彼岸至所謂銅寺者尤爲捧腹高不及
三尺濶僅尺餘相傳爲風磨銅所鑄以余觀之黯
澹無華蓋尋常黃銅耳古語之不足徵大率類此
昔右軍之紀蘭亭也崇山峻嶺極口鋪張讀其文
不啻置身茂林修竹間其實所見不逮所聞昔之
遊蘭亭與今之登藍橋同賦倦遊可也

步月訪藍橋驛

當年古驛共知名玉杵元霜百感生過客今宵殊渴甚
月明何處喚雲英

橋旁舊有藍橋驛今廢相傳裴航遇老姥喚雲英

浙東紀遊草

四

取茶處

石板埠道中

萬山深處且行吟忽露青青一點岑想是謝公遊未及
好山埋沒到如今

華頂言旋從亂山中繞坡涉澗而行忽至一處巖
阿深邃古樹參天澗中流泉飛瀉其勝遠過藍橋
因無寺院遊人罕至若從舊路而歸焉能際此奇
境老人與茲山爲奇遇茲山亦必以老人爲知己
徘徊不能去相對狂叫響震巖谷噫懷才而不遇
者始與茲山同一感慨也

宿石板埠題壁

山行健踏路重重古埠停驂聽晚鐘
剪燭高吟題壁處天邊鴻雁或相逢

埠爲冠蓋往來之道吾兩弟宦遊溫處
倘解鞍此地覩題句而念友于知老人
桑榆無恙且遊興頗濃亦他日相逢之
佳話也

過新昌縣

古道斜陽野趣長山城遙指是新昌
繞城一帶清流水流入衙厨泡菜湯

浙東紀遊草

五

通出入時張邑侯頗清廉民間有日日煮山笋朝
朝泡茶湯之諺

紆道至寧波

歸程依舊賦曹娥古畫圖中兩度過
過只爲老人遊未倦百官問渡至寧波

江邊之山俱堪入畫而畫圖山獨擅名
千古噫亦此山之幸也百官渡名有虞
帝廟二妃祠往寧波者必由此乘舟出
寧波江口有土壩兩重石壩一重

鄞江靈橋

橫鋪江面是靈橋龍卧虹飛百尺遙鐵鎖聯船船覆板
行人猶自怯春潮

寧波江又名鄞江江面甚濶潮汐衝激不能建橋
用船三十餘頭鐵纜聯絡之上覆木板海舶進口
仍可解開

歸途

囊空興盡亦堪憐欲典青衫不值錢幸得長年逢故老
一帆送到五湖邊

由西興渡江至武陵尋寓整頓歸家而錢囊已罄
正在躊躇忽遇鄰老林某操舟爲業卽乘其舟而

浙東紀遊草

六

歸亦可謂他鄉遇故知也

握別吳公

竹林原是舊交情祇爲敲碁又訂盟千里浪遊同涉險
他年載酒更偕行

首春入城偶晤吳公爲姪輩舊友年逾花甲性亦
灑脫碁則勝老人一先惟嗜酒與老人不同志初
遊洞庭太湖遭風船幾覆繼至武陵渡江又遇狂
飈衣衫盡濕在寧波江中困遭夜雨更可危者萬
山深處輿夫失足幾致墮崖而吳俱不介意惟天
台道上華頂峯間沽酒不可得常不滿其懷抱云

題詞

迂鶴壽 青崖

聞道天台在海涯登臨千里與非賒精神斗藪窮三島
詩句瀾翻快八叉豈有元霜浮玉杵何曾晚飯進胡麻
一經此老推敲後應笑與公賦太誇

又

何其偉 書田

夙慕吳興叟詩壇老斲輪一生耽集古千里健遊春林
壑資吟眺 尊居有園亭 泉石之樂 琴書悅性真一編浙東草三復
句清新

又

姚慰祖 竹亭

先生遊山如弈碁窮極變幻樂不疲諸峯羅列擬布子
題詞

全越方罫探神奇天台盛傳與公賦老健攀登作虎步
眼前局勢卻凡庸掀髯笑指藍橋路仙蹤何許空流雲
名勝所見殊所聞蘭亭之序天姥詠詞人摹繪多虛文

蘭亭之不逮所聞已見遊草中而陳
四橋先生云天姥峯亦無甚佳勝 善遊欣賞有絕識

亂山堆裏窺秀特譬若隱流不好名意外相逢稱莫逆
水行陸行不計程揮毫卽景添吟情滄桑易變感浮生
爛柯山頭局未更底用塵世爭一著飄然直欲凌蓬瀛
伊余孤負尙平願迂談轉爲芻蕘獻羅刹風波防覆危
危崖失足幾顛顛 俱見遊
草中 高年一往乘興豪遠涉深淵
厯險峻何如近地穩揚舫七十二峯環畫屏尋幽幾處

扣禪扃不然携碁向西泠手彈坐對越山青煙鬟霧鬢
相忘形吟囊得句通仙靈暢遊儘樂三千齡

外舅愚溪先生惠讀浙東遊草意有不滿藍橋華

頂諸勝因爲推廣其說

柳樹芳 古槎

讀書不盡信遊山不盡奇執古以論今此說然乎疑文
人好穿鑿每多非夷思談天極高遠括地窮荒夷若論
十洲記言多不可知若論三都賦未必盡如斯江山不
能言藉人以爲詞入蜀古無作爭傳少陵詩柳州向無
記乃自子厚爲文章由心得豈無抑塞時一朝相觸發
任我鋪張之所以蒙莊叟窮極荒唐辭子虛烏有說此

題詞

二

老爲之師藍橋本無仙華頂徒崎嶇我翁豁達胸立說
多排擠我非附和者如聞唱曉雞入台縱有願母爲神
仙迷

跋

愚溪先生性頗落拓不事舉子業好稗官野乘於唐宋數百家說部無不通曉遇人輒與之談故原原本本議論風生聽者莫不稱快平生有二癖一碁癖聞有善弈者必邀至家連朝對弈一山水癖雖未能周覽天下名山大川而於吳越佳山水足迹必至焉今年七十有五矣登臨之興至老不衰春杪偕其碁友吳公涉洞庭上包山遂揚帆南去縱遊天台華頂間所至卽以詩紀之積成一卷名曰浙東紀遊草一時興會所寄竝不求工然如野曠天低萬山深處諸作神韻天然雖工於詩者

跋

恐不逮也先生獨怪天台藍橋乘志所載聞過其實余謂天下事有目見不如耳聞者山水是也又有祇可耳聞不必目見者神仙是也昔秦王漢武使人入海求仙皆無蹤迹史公作封禪書敘述其事煙雲變滅若有若無令讀者迷離恟恍不知所指夫神仙之有無不可知而史公之筆墨卽神仙矣後之讀其書者亦飄飄然作神仙想矣必欲求真神仙安所得而遇諸乘志稱天台之高萬有八千丈覽者信爲固然今先生至其地乃知無數培塿漸漸高起竝無突兀崢嶸之勢然則天下名勝大率類此豈獨天台哉至於劉阮遇仙裴航求飲出

自小說家附會藍橋之無足觀更不待言矣先生雖不
滿於天台諸勝然此遊有三樂渡羅刹汎曹娥宿華頂
經石板於亂山中忽遇奇境相對狂吟徘徊不能去此
非山水之樂乎七秩老人精神矍鑠涉歷風波搜尋澗
壑每逢得意迅筆直書悠然而往倏然而歸由其胸中
一無疑滯故能行止自如雖神仙之樂不是過也而又
得同志如吳公千里崎嶇朝夕相對是又朋友之樂也
余在先生家讀書四載每於花辰月午聆厥清言勝讀
坡仙海外諸文茲以浙東紀遊草見示諷誦之下如遇
先生於瀛洲蓬島間昔元之季年我族有士霖公移家
跋

天台貝清江贈以詩有赤城雲氣神仙家千樹萬樹蟠
桃花當時劉郎亦草草出山卻憶山中好山空水流雲
自飛劉郎看花須早歸之句後人不知尙有在否屢欲
往訪不能如願今讀先生詩益令我夢想不置云

嘉慶己卯五月三日青崖迮鶴壽書

沈愚溪小傳

長洲顧日新撰

晉何準不應徵辟謂第五之名何減驃騎當世信之晉史載之以爲美談準之此言蓋實有足以自重者史徒稱其高尚寡欲而不及其他元明以降則未有舉是例以傳其人者故昔之隱逸易以顯而今之隱逸難以彰然而董子有言天不變則道不變其人之足重故自在也柳子古槎稱其婦翁沈愚溪之爲人有足感者假使愚溪而生於晉之世其高尚寡欲何遽不如準而準以此名高千古愚溪乃自一二戚友外人無知者風俗之所趨可知已愚溪性好遊而不役於榮利觀其著書上

傳

一

包山過蘭亭訪天台意興至老不衰乃其持論則獨以爲右軍之序興公之賦皆不足取信彼其意中之天台蘭亭宜必有超乎庸常所見而所見乃止此則其胸懷之奇詭卓犖當必有筆墨所不能傳而口語所不能宣者惜乎吾未見其人也古槎又稱其爲人慷慨遇事樂施無吝色歲饑恒出米爲鄉人先其於骨肉恩尤摯嘗有從孫某患貧爲起其家立千金產俾之專力於學然苟遇所不可則峻拒而不少姑容其剛褊又如此事若出於兩途者是可知也且夫天台蘭亭勝境也一不當君意尙不欲隨衆爲附和而謂遇夫凡庸鬼瑣之倫反

能和光同塵不致扞格而不相入則是臻穢墟厯莽邱
而欲迴君之顧也其可得耶君嘗道出石板埠於一處
歎其山水幽絕而世顧無賞者蓋獨鑒之難如此君亦
用以自況云爾君生平工篆刻分湖間無與抗者倦遊
以還不復問世事身惟坐隱是耽終以不容物致累遂
病不起惜乎吾未見其人也君名錫爵字思美以愚自
晦因號愚溪云

傳

二

先外舅沈愚溪先生狀畧

先外舅愚溪先生鬚髯磊落音聲清朗兩目閃閃有光自幼讀書目數行下卽能通曉大意繼爲文揮灑如飛不假思索及長不屑事章句嘗慨然有志於世凡農田水利刑名法律諸書無不旁通而曲證繼以張太孺人年且高不欲重違其意乃閒居養志依膝下者數年自太孺人歿而年已五十矣是時一子多病翁遂絕意進取構園亭數間讀書其中自正史紀傳稗官野乘以及唐宋元明諸說部類皆流覽靡遺與人言若河漢之傾倒未可以更僕終蓋其胸中之宏富有非經生家所能

狀畧

企及者性好山水嘗一至邗江謂多脂粉氣不若西子湖天然本色令人傾對無已慕蘭亭之遺蹟及至其地謂右軍之極口鋪張乃文人之粉飾不足盡信至天台謂藍橋華頂諸勝與古書所載大不相符其議論多見諸紀事詩中蓋卽一遊覽間而翁之卓識不肯隨人附和如此豈徒遇事之爲能有定力哉平生多義行乾隆某年同族不戒於火翁居獨無恙因慨然各有所贈嘉慶甲子歲連雨水荒甲戌歲久旱不雨不俟上官令獨能減價平糶爲里中先胞姪孫德培能讀書補諸生而不足於貲嘗授田二百餘畝贈銀千兩論者謂其待之

太優而翁亦毅然不顧也晚年無所發其意往往寓諸
一枰中連日繼晷手談忘疲顏其室曰橘隱始亦古商
山叟之亞與喜作詩懶不自惜浙東紀遊草一卷乃同
人慇懃而存翁仍不以此自命也少壯時喜爲篆刻於
文何兩家章法刀法多能道其體製而一出以神運分
湖工斯技者不少羣推此翁爲鑒賞家樹於丁卯歲爲
翁家婿屈指十五年受教最深翁子學履先一年卒長
孫早亡次孫志達甫三歲而翁之行事其能忍而聽其
湮沒耶因爲詮次其畧以俟

狀畧

二

晚號愚溪老人世居吳江縣之大勝村生於乾隆丙寅
年正月初十日歿於道光辛巳年七月二十一日享年
七十有六國學生以子職封儒林郎

總服子婿柳樹芳百拜撰

古籍电子书

欢迎您的光顾

网址：<http://www.xy980.net>

QQ:77815100 电话:15879335110

联系制作：古籍电子书工作室